

समा. 09.20 Hrs

Headlines

- प्रधानमंत्री नरेन्द्र मोदी कानूनी सहायता देने सरबन्धी तंत्र गी होर तगड़ा बनाने लेई अज्ज सुप्रीम कोर्ट च राश्ट्री सम्मेलन दा उद्घाटन करडन।
- केन्द्री मंत्री डाक्टर जीतेन्द्र सिंह होरें भारत-पाकिस्तान बन्ने कश वंदे मातरम पथ जातरा गी शुरु करोआया। उ'नें राश्ट्र दे प्रथम सैनिकें दे तौर पर बन्ने आहले बसनीकें दी सराहना कीती।
- जम्मू-कश्मीर ने 1 करोड़ 26 लख आधार नम्बर तैयार करदे होई 93 फीसद बसनीकें गी आधार दे दायरे हेठ आहने दी उपलब्धि हासल कीती ऐ। मुख्य सचिव होरें इस प्रक्रिया दी अमल-आवरी दी समीक्षा कीती।
- सिनेमा ते संस्कृति दे इक हफ्ते तगर चले दे जशन दे मगरा 5मां कश्मीर वर्ल्ड फिल्म फेस्टिवल कल श्रीनगर दे टैगोर हॉल च संपन्न होई गेआ।
- जम्मू च आयोजित होने आहली पैहली- पैहली बी.एस.एफ. जम्मू मैराथन लेई 6 ज्हार शा मते लोकें पंजीकरण करोआया ऐ।

<><><><><><>

PM Conference Legal Aid

अज्ज संजा प्रधानमंत्री नरेन्द्र मोदी होर नमीं दिल्ली च भारत दे सुप्रीम कोर्ट च कनूनी सहायता हासल करने दे तौर-तरीकें गी मजबूत करने सरबन्धी राष्ट्री सम्मेलन दा उदघाटन करंगन। ओह राश्ट्री कनूनी सेवा प्राधिकरण (NALSA) आस्सेया विकसित सामुदायिक मध्य-स्थिरता प्रशिक्षण मॉडयूल दा बी शुभारम्भ करगंन ते हाजर लोकें गी सम्बोधित करगंन।

दंडु दिनें तगर चलने आहले इस सम्मेलन च कनूनी सेवाएं सरबन्धी ढांचे दे महत्वपूर्ण तत्वे पर चर्चा कीती जाग- जिंदे च कनूनी सहायता रक्षा काउंसल प्रणाली- पैनल वकील- पैरा-लीगल स्वयंसेवी- स्थाई लोक अदालतें ते कनूनी सेवा संस्थानें दे माली प्रबंधन शामिल न।

<><><><><><>

Vande Matram Yatra

एकता ते देशभक्ति दा जश्न मनाने आहले भारत दे राष्ट्रगीत वंदे मातरम दी 150मी बरे गंड दे मौके पर जम्मू खिते च बक्ख-बक्ख कार्यक्रमें दा आयोजन कीता गया। कल केन्द्रीय मंत्री डाक्टर जितेन्द्र सिंह होरें कठुआ जिले च भारत-पाक बन्ने पर लोंडी ग्रां थमां सरहदी चौकी तपन तोड़ी 150मी बरे दी वंदे मातरम पथ यात्रा दा उदघाटन कीता। बी.एस.एफ नै इस यात्रा दा सोआगत कीता- जिसलै के विद्यार्थि बसनीकें ते अधिकारियें देशभक्ति दे नारे लांदे होई 100 मीटर दा तिरंगा झंडा फगड़े दा हा। किट्ठै गी सम्बोधित करदे होई डाक्टर सिंह होरें बन्ने दे बसनीकें गी राष्ट्र दा पैहला सैनिक करा'र दिंदे होई सराहना कीती ते वंदे मातरम गी राष्ट्री गौरव ते एकता दा इक स्थाई प्रतीक दस्सेया। मीडिया कन्ने गल्ल करदे होई डाक्टर जितेन्द्र सिंह होरें आखेया.....

<><><><><><>

Ayush Vande Matram

भारत दे राष्ट्री गीत वंदे मातरम दे 150 बरे पूरे होने दे उपलक्ष्य च बरे भर चलने आहले समारोहें दे हिस्से दे तौरा पर आयुष विभाग रामबन जिले च विशेष कार्यक्रमें दा आयोजन करा'रदा ऐ- जिंदे च रिवायती भारती औषधि प्रणालयें पर आधारित मुफ्त सेहत परामर्श ते इलाज बी शामिल न।

सीनियर मैडिकल अफसर ते जिला योग कोआर्डिनेटर डाक्टर मसूद इकबाल जरगर होरें आखेया ऐ जे दिती जाने आहली सेवाएं च मुफ्त बुनियादी सेहत जांच दे कन्नो-कन्नी सेहत बारे जागरुकता सत्र ते जिले दियें बक्ख-बक्ख सामुदायिक थाहरें पर दोआइयां ते रोग प्रतिरोधक क्षमता बधाने आहली दोआइयां बंडनियां बी शामिल न। उर्ने आखेया.....

<><><><><><>

CS AAdhar

मुख्य सचिव अटल डुल्लु होरें जंदे रोज यू.आई.डी.ए.आई. दी अमलावरी कमेटी दी इक बैठक दी अध्यक्षता कीती। बैठक दा मकसद पूरे जम्मू-कश्मीर च आधार सरबन्धित पैहलकदमियें दी समीक्षा करना ते प्रमाणीकरण प्रणाली गी बेहतर बनाना हा। बैठक च दस्सेया गया जे केन्द्र शासित प्रदेश नै इक करोड़ 26 लक्ख आधार नम्बर जारी करदे होई 93 फीसद आधार कवरेज हासल करी लैती ऐ। मुख्य सचिव होरें मैहकमे गी निर्देश दिते जे ओह 5 बरें दी बरेसू तगर दे बच्चें गी तरजीह देन, बायोमैट्रिक अपडेट च तेजी आनन ते मती पारदर्शिता लेई क्यू-आर. कोड समर्थ प्रमाण-पत्रें गी लागू करन। जिले, स्कूलें ते आंगनवाड़ी केन्द्रें च विशेष नामांकन शिविर लागंन। यू.आई.डी.ए.आई. नै प्रमुख धार्मिक थाहरें पर फेस ऑथेंटिकेशन दा इस्तेमाल करने दा सुझा दिता ऐ जिसलै के नमैं आधार सेवा केन्द्र ते उन्नत प्रामाणिकरण प्रणाली कन्नै पूरे जम्मू-कश्मीर च सेवा देने च होर सुधार होग।

<><><><><><>

Digital Life Certificate

जम्मू-कश्मीर सरकारै पेंशनरें लेई डिजीटल लाईफ सर्टिफिकेट अभियान दे चौथे गेड़ दी शुरुआत कीती ऐ। एहदा मकसद जीवन प्रमाण ते आधार फेस आर.डी. मोबाईल ऐप्स दे राहें डिजिटल प्रमाणन आले तरीके अपनाने लेई पेंशनरें दा दिल बधाना ऐ। अमले, सार्वजनिक शकैतें ते पेंशनें सरबंधी मंत्रालय दे सैहयोग कन्नै चलाई जा रदी इस पैहलकदमी दा मकसद पेंशन प्रमाणन आहली प्रक्रिया गी सखल्ला बनाना ऐ ते ट्रेजरिंग ते बैंकें च जाने दी जरूरत गी घट्ट करना ऐ। पेंशनर हुन इस बवस्था दे तैहत आपू अपना जीवन प्रमाण-पत्तर डिजिटल तरीके कन्नै तयार करी सकगंन। एहदे लेई पेंशनरें गी websitejeevanpraman.gov.in पर जाना होग।



Film Festival

सिनेमा ते संस्कृति दे इक हफ्ते तगर चले दे जश्न दे मगरा 5मां कश्मीर वर्ल्ड फिल्म फेस्टिवल कल श्रीनगर दे टैगोर हॉल च संपन्न होई गेआ। फिल्म उत्सव दे डरैक्टर मुश्ताक अली अहमद खान होरें इस मौके पर गलाया जे इस दरान भारत ते बदेशें दिआं बी कोई 60 फिल्मां दस्सियां गेइयां जेहिइयां बक्ख-बक्ख भाशाएं ते विशें पर आधारत हिआं। इस मौके पर बक्ख-बक्ख श्रेणिएं च पुरस्कार बी दिते गे जिंदे च फीचर फिल्मां, दस्तावेजी फिल्मां ते एनीमेशन फिल्मां शामिल हिआं। सरबंधत अधिकारिण आखेआ ऐ जे इस उत्सव ने नां छड़ा सिनेमा सरबंधी हुनर गी बढ़ावा दिता ऐ सगुआं कश्मीर दी बेजोड़ कुदरती खूबसूरती दा बी प्रचार कीता ऐ ते हुन होर मते फिल्म निर्माता ते सैलानी पक्क गै इस बक्खी आकर्षित होइन। इस सरबंधे च मीडिया कर्मिण कन्नै गल्ल करदे होई फेस्टिवल डरैक्टर मुश्ताक अली अहमद खान होरें आखेआ



BSF Marathon

फ्रंटियर मुख्यालय बी.एस.एफ जम्मू आसेया आयोजित पैहली-पैहली जम्मू बी.एस.एफ. मैराथन -2025 लेई 6 जहार शा मते धावकें अपने नां दर्ज करोआए न। एह मैराथन कल जम्मू दे पलौड़ा च बी.एस.एफ परिसर च होग। इस मैराथन च 42 किलोमीटर, 21 किलोमीटर, 10 किलोमीटर ते 5 किलोमीटर दी द्रौड़ शामिल ऐ ते पूरे भारत थमां प्रतिभागी हिस्सा लेंगन। इस कार्यक्रम गी शुरु करने आस्तै जंदे रोज पलौड़ा च इक प्रैस कांफ्रेंस दा सरिस्ता कीता गया- जेदी अध्यक्षता बी.एस.एफ जम्मू दे आई.जी शंशाक आनंद होरें कीती। इस मौके पर बोलदे होई आई.जी. बी.एस.एफ होरें आखेया.....

<><><><><><>

Army Cmdr

फौज दी पच्छमी कमान दे कमांडर लेफ्टिनेंट जनरल मनोज कुमार कटियार होरें जम्मू, कठुआ, सांबा ते पठानकोट आहले अगेत्रे इलाकें च तैनात फौजी बलें दिएं कार्रवाईएं सरबंधी तैयारिं दा जायजा लैता ऐ। फौजी कमांडर होरें बलें दिएं तैयारिं ते सतर्कता पर संदोख जताया ते आखेआ जे साढ़े बल कुसै बी आपात स्थिति दा मुकाबला करने लेई पूरी चाल्ली तैयार न। लेफ्टिनेंट जनरल कटियार होरें बलें दे पेशेवराना जज्बे ते नमीं उभरदी तकनीकें दे इस्तेमाल सने कार्रवाईएं सरबंधी उत्कृष्टता दे उच्चे मयार जकीनी बनाने लेई बलें दी सराहना कीती। उ'नें आखेआ जे फौजी बलें दी सतर्कता ते पक्का ध्येइया, राष्ट्र दी सुरक्षा ते रक्षा सरबंधी तैयारिं दे प्रति भारती फौज दी मजबूत वचनबद्धता गी दर्शादे न।

<><><><><><>